



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KEEMPAT
MESYUARAT PERTAMA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Reformasi Proses Pilihan Raya dan Suruhanjaya
Pilihan Raya (SPR)**
- *YB. Tuan Khoo Poay Tiong (Kota Melaka)* (Halaman 1)
- **Sektor Perkilangan Minuman Beralkohol dalam
'Negative List'**
- *YB. Tuan Chan Foong Hin (Kota Kinabalu)* (Halaman 4)

MALAYSIA
KAMAR KHAS
PARLIMEN KEEMPAT BELAS
PENGGAL KEEMPAT
MESYUARAT PERTAMA
Selasa, 21 September 2021
Mesyuarat dimulakan pada pukul 2.30 petang
DOA

*[Tuan Yang di-Pertua **mempengerusikan Mesyuarat**]*

UCAPAN DI BAWAH USUL
BERKENAAN PERKARA TADBIR KERAJAAN (P.M. 17)

Reformasi Proses Pilihan Raya dan
Suruhanjaya Pilihan Raya (SPR)

2.34 ptg.

Tuan Khoo Poay Tiong [Kota Melaka]: Tuan Yang di-Pertua, tajuk ucapan saya pada hari ini ialah Reformasi Proses Pilihan Raya dan Suruhanjaya Pilihan Raya (SPR). Tuan Yang di-Pertua, proses pilihan raya wajar ditambah baik bagi meningkatkan integriti dan kelancaran pilihan raya di Malaysia, khususnya dalam konteks pandemik COVID-19 ini.

Saya mengambil kesempatan ini untuk membangkitkan beberapa isu mengenai proses pilihan raya dan Suruhanjaya Pilihan Raya (SPR). Isu yang pertama, Undi18 dan Pendaftaran Pemilih Automatik (PPA). Pada bulan Julai 2019, Dewan Rakyat telah sebulat suara meminda Perlembagaan Persekutuan untuk menurunkan had umur mengundi kepada 18 tahun dan memperkenalkan proses Pendaftaran Pemilih Automatik (PPA).

Namun, sehingga kini SPR belum melaksanakan pemindaan ini. SPR telah berkata bahawa terdapat urusan teknikal yang perlu diselesaikan sebelum perkara ini boleh dikuatkuasakan. Saya ingin memohon SPR dan kerajaan menyatakan secara terperinci apakah isu-isu teknikal yang sedang dihadapi ini. Selain itu, saya juga ingin memohon SPR memberikan garis masa terkini untuk pelaksanaan Undi18 dan Pendaftaran Pemilih Automatik (PPA).

Isu kedua iaitu kebebasan Suruhanjaya Pilihan Raya (SPR). SPR merupakan sebuah badan bebas yang ditubuhkan di bawah Perlembagaan Persekutuan bagi memastikan pilihan raya dijalankan secara adil. Sebagai sebuah badan yang begitu

penting, SPR perlu bersifat *accountable* dan telus. Dalam erti kata lain, SPR tidak terkecuali daripada pemantauan untuk tujuan semak dan imbang. Maka, persoalannya, apakah cara terbaik untuk memantau SPR dan SPR sepatutnya lapor kepada siapa. Buat masa ini, SPR terletak di bawah naungan Jabatan Perdana Menteri.

Contohnya, kita boleh lihat hari ini Yang Berhormat Menteri di Jabatan Perdana Menteri yang akan menjawab bagi pihak SPR. Pada pendapat saya, SPR sepatutnya lapor kepada Parlimen secara langsung. Pada bulan Oktober 2019, Parlimen telah menubuhkan sebuah Jawatankuasa Pilihan Khas (JKPK) untuk pilihan raya bagi tujuan ini.

Malangnya, jawatankuasa tersebut telah dimansuhkan ketika Kerajaan Perikatan Nasional mengambil-alih. Menurut Yang Berhormat Menteri pada ketika itu, fungsi pemantauan SPR boleh dimasukkan ke dalam Jawatankuasa Pilihan Khas (JKPK) bagi agensi-agensi di bawah Jabatan Perdana Menteri. Struktur ini tidak sesuai kerana ini bermakna kerajaan menganggap SPR sebagai sebuah agensi Jabatan Perdana Menteri. Selain itu, terdapat lebih 40 agensi di bawah Jabatan Perdana Menteri. Maka, bolehkah Jawatankuasa Pilihan Khas ini memantau SPR dengan berkesan?

Maka, saya meminta penjelasan daripada kerajaan yang baharu ini, sama ada kerajaan akan mencadangkan kepada Jawatankuasa Dewan untuk mewujudkan semula Jawatankuasa Pilihan Khas-Pilihan Raya.

Isu ketiga berkaitan dengan pelantikan Ahli SPR. Proses pelantikan Ahli-ahli SPR adalah sangat penting bagi memastikan kebebasan SPR. Di bawah Perlembagaan, tujuh orang Ahli SPR dilantik oleh Duli Yang Maha Mulia Yang di-Pertuan Agong. Namun secara praktikalnya, pencalonan adalah oleh pihak kerajaan.

Maka dengan ini saya meminta penjelasan tentang apakah proses dan kriteria yang diguna pakai oleh kerajaan ketika melaksanakan proses pelantikan Ahli SPR dan apakah langkah-langkah yang akan diambil oleh kerajaan untuk memastikan proses ini telus dan bebas. Sekian, terima kasih.

2.39 ptg.

Timbalan Menteri di Jabatan Perdana Menteri (Parlimen dan Undang-undang) [Datuk Wira Hajah Mas Ermieyati binti Samsudin]: Terima kasih, Tuan Yang di-Pertua. Kerajaan khususnya Jabatan Perdana Menteri amat menghargai dan mengucapkan ribuan terima kasih atas keprihatinan Yang Berhormat Kota Melaka yang telah mengemukakan ucapan di bawah Usul berkenaan Perkara Tadbir

Kerajaan (Peraturan Mesyuarat 17), berkaitan Reformasi Proses Pilihan Raya dan Suruhanjaya Pilihan Raya (SPR).

Tuan Yang di-Pertua, Ahli Yang Berhormat telah membangkitkan tiga isu dalam usul tersebut dan penjelasannya adalah seperti berikut; Pertama Undi18 dan Pendaftaran Pemilih Automatik (PPA). Untuk makluman Yang Berhormat, SPR sedang dalam persiapan untuk melaksanakan pindaan Perkara 119 Perlembagaan Persekutuan iaitu berhubung dengan umur kelayakan pengundi 18 tahun dan pendaftaran pemilih secara automatik sebagaimana yang telah diluluskan oleh Parlimen pada Mesyuarat Kedua, Penggal Kedua, Parlimen Keempat Belas yang lalu.

Persiapan yang sedang dilaksanakan oleh SPR ini adalah meliputi pindaan kepada Peraturan-peraturan Pilihan Raya (Pendaftaran Pemilih) 2002 dan undang-undang lain yang berkaitan, penyediaan *Standard Operating Procedures* (SOP), penyediaan sistem serta infrastruktur bagi pelaksanaan umur kelayakan pengundi 18 tahun dan juga pendaftaran pemilih secara automatik.

Di samping itu juga, SPR telah pun mengenal pasti beberapa tindakan yang perlu dilaksanakan sebelum pelaksanaan umur kelayakan pengundi 18 tahun dan pendaftaran pemilih secara automatik. Antaranya, ialah membuat semakan maklumat bakal pemilih, semakan di lapangan yang melibatkan bakal pengundi berumur 90 tahun dan ke atas, semakan di lapangan ke atas alamat untuk memastikan penentuan bahagian pilihan raya yang tepat, sesi libat urus dengan semua pihak-pihak yang berkepentingan, program pendidikan pengundi kepada bakal pemilih dan juga menyemak keperluan logistik bagi persediaan menghadapi Pilihan Raya Umum Ke-15 yang akan datang.

SPR menjangkakan semua persiapan yang sedang diambil tindakan termasuklah isu-isu yang berkaitan ini akan dapat diselesaikan dan seterusnya melaksanakan umur kelayakan pengundi 18 tahun dan pendaftaran pemilih secara automatik selewat-lewatnya pada September 2022. Namun begitu, keputusan semakan kehakiman isu Undi18 di Mahkamah Tinggi Kuching telah pun memerintahkan supaya umur kelayakan pengundi 18 tahun dan pendaftaran pemilih secara automatik dilaksanakan selewat-lewatnya pada 31 Disember 2021.

Jadi, apabila Yang Berhormat bertanya sebentar tadi berkenaan dengan tentang garis masa, iaitu walaupun dengan kekangan dan juga serba kekurangan, SPR komited untuk memastikan umur kelayakan pengundi 18 tahun dan pendaftaran pemilih secara automatik dilaksanakan berdasarkan kepada keputusan mahkamah.

Kedua berkenaan dengan kebebasan SPR. Sebagaimana Ahli Yang Berhormat sedia maklum, SPR ditubuhkan di bawah Perkara 114 Perlembagaan

Persekutuan dan tertakluk kepada peruntukan undang-undang Persekutuan dalam melaksanakan tiga fungsi utamanya sebagaimana yang termaktub di bawah Perkara 113 Perlembagaan Persekutuan iaitu menjalankan pilihan raya, menyediakan dan menyemak daftar-daftar pemilih pilihan raya dan mengkaji persempadanan bahagian-bahagian pilihan raya.

Penubuhan SPR adalah di bawah mandat eksekutif dan berada di bawah Jabatan Perdana Menteri yang bertanggungjawab dalam hal ehwal pentadbiran dan pengurusan am SPR sahaja. Adalah menjadi tanggungjawab SPR di bawah Perlembagaan Persekutuan, akta dan peraturan-peraturan pilihan raya berkaitan untuk memastikan pilihan raya melalui proses yang bebas dan adil agar demokrasi negara kekal terpelihara.

Saya juga hendak menambah di sini bahawa, Yang Berhormat Menteri juga telah menyatakan bahawa beliau akan fokus terhadap transformasi Parlimen, transformasi kerajaan dan juga Perkara MA63. Saya merasakan bahawa itu juga adalah sebagai *undertake* beliau untuk sama-sama memastikan ketelusan dan juga proses demokrasi dan juga adil yang berlaku dalam negara kita ini, *insya-Allah*.

Ketiganya, pelantikan Ahli SPR. Berhubung isu pelantikan Ahli SPR, di bawah Perkara 114(1) Perlembagaan Malaysia, keanggotaan SPR hendaklah dilantik oleh Yang di-Pertuan Agong selepas berunding dengan Majlis Raja-raja. Manakala, peruntukan berkaitan saraan, keistimewaan dan perlindungan Ahli-ahli anggota SPR adalah sebagaimana termaktub di bawah Akta Suruhanjaya Pilihan Raya 1957. Sekian, terima kasih.

Sektor Perkilangan Minuman Beralkohol dalam 'Negative List'

2.44 ptg.

Tuan Chan Foong Hin [Kota Kinabalu]: Terima kasih kepada Tuan Yang di-Pertua di atas peluang kepada saya untuk berucap di dalam Kamar Khas ini.

Tuan Yang di-Pertua, saya dengan sesungguhnya berpendapat bahawa keputusan Kerajaan Persekutuan Perikatan Nasional (PN) untuk meletakkan kilang dan kedai alkohol dalam senarai negatif dan tidak memberikan pengecualian apa pun untuk sektor pembuatan dan perdagangan minuman beralkohol semasa PKP merupakan tindakan yang kurang sensitif dan *double standards*, dengan izin.

Kerajaan nampaknya menetapkan syarat-syarat untuk beroperasi perniagaan secara sangat sewenang-wenangnya dan berselindung di bawah label '*essential*' dan '*non-essential*'. Persoalannya, apakah yang dimaksudkan dengan perkataan '*essential*'? Ya, ia bermaksud 'penting', tetapi apakah tahap yang harus

dicapai bagi diiktiraf sebagai penting? Penting untuk mengekalkan ekonomi, penting untuk membahagiakan rakyat, penting untuk mengekalkan taraf hidup yang ada sebelum PKP atau hanya sekadar penting untuk mengekalkan kehidupan?

Tidak semua makanan dan minuman adalah sama dan semuanya berbeza. Ada yang dianggap kurang penting daripada yang lain. Takkanlah hanya air suam kosong sahaja yang '*essential*' dan penting? Kerajaan ini dengan jelas menganggap semua minuman beralkohol sebagai tidak penting ataupun '*non-essential*'.

Bagi masyarakat bukan Muslim, itu adalah bahagian penting dari budaya kami kerana ia membantu anggota masyarakat kami bersama-sama merayakan dan memupuk perpaduan dan kebersamaan. Bagi kami orang Cina, kami bahkan meraikan ulang tahun makan dengan makan *Red Wine Mee Sua* dan meminum Yomeishu semasa berpantang setelah melahirkan anak.

Pengambilan minuman beralkohol secara sederhana tidak pernah menjadi masalah. Penyalahgunaan yang menjadi masalah dan ada undang-undang yang sedia ada bagi menghukum penyalahgunaan bahan tersebut. Selain itu, kerajaan nampaknya secara tidak langsung mengakui pembuatan dan penjualan minuman beralkohol sebagai '*essential*' semasa perayaan Kaamatan dan Gawai kerana mereka telah menangguhkan pengumuman dan penguatkuasaan SOP yang mengandungi senarai negatif sehingga selepas 1 Jun walaupun telah mengumumkan PKP pada 28 Mei. Maka persoalannya ialah mengapa ada *double standards*?

Kerajaan mungkin berpendapat bahawa rakyat Malaysia tidak menghasilkan minuman beralkohol dalam perniagaan berskala kecil dan hanya syarikat besar seperti Carlsberg atau Heineken yang melakukannya, tetapi sebenarnya tidak demikian. Di Sabah, terdapat banyak Perusahaan Kecil dan Sederhana (PKS) asli yang menghasilkan minuman beralkohol seperti Lihing, Montoku, tuak, dan tapai. Mereka sangat gembira kerana pengumuman larangan tersebut dibuat hanya selepas perayaan Kaamatan dan Gawai. Bayangkanlah saja minuman beralkohol dilarang semasa Kaamatan dan Gawai, ia tentunya tidak baik dan merupakan langkah yang tidak sensitif.

Oleh itu, saya dengan ini menggesa kerajaan untuk memikirkan semula larangan mereka sepenuhnya terhadap operasi kilang alkohol dan kedai menjual alkohol sebelum terlambat dan menyebabkan kerosakan terhadap masyarakat minoriti di negara kita. Itu sahaja ucapan saya. Terima kasih Tuan Yang di-Pertua.

2.47 ptg.

Timbalan Menteri Perdagangan Antarabangsa dan Industri [Datuk Lim Ban Hong]: Terima kasih, Tuan Yang di-Pertua. Saya ucapkan terima kasih kepada keprihatinan Yang Berhormat Kota Kinabalu. Dalam berhadapan dengan ancaman pandemik COVID-19 yang telah mengekang pergerakan individu, termasuk pekerja, pihak kerajaan telah mengambil pendekatan mengimbangi perlindungan nyawa dan kelangsungan hidup untuk memastikan sektor-sektor ekonomi tertentu dapat terus beroperasi. Faktor perlindungan nyawa dan kelangsungan hidup merupakan faktor-faktor yang diberikan penekanan oleh kerajaan.

Tuan Yang di-Pertua, dalam menentukan sektor yang akan beroperasi, faktor-faktor yang diambil kira adalah seperti sumbangan sektor tersebut kepada pertumbuhan ekonomi negara, peluang pekerjaan yang diwujudkan dan juga kepentingan sektor tersebut dalam kelangsungan rantai bekalan produk kritikal seperti peralatan perubatan, makanan dan minuman, *semi-conductor* dan peralatan perlindungan peribadi (PPE). Penentuan sama ada sesuatu sektor itu dibenarkan beroperasi atau tidak, dalam tempoh Perintah Kawalan Pergerakan (PKP) ataupun Yang Berhormat menggunakan istilah '*essential*' atau '*non-essential*' tidak ditentukan secara sewenang-wenangnya, tetapi akan dibincang dan diputuskan dalam Majlis Keselamatan Negara (MKN) dengan mengambil kira pandangan dan pendapat kementerian-kementerian yang berkaitan terutamanya Kementerian Kesihatan Malaysia.

Untuk sektor makanan dan minuman, kilang yang menghasilkan makanan dan minuman keperluan asas diberikan keutamaan untuk beroperasi dalam tempoh Perintah Kawalan Pergerakan (PKP). Walau bagaimanapun, sektor ekonomi telah dibuka secara berperingkat mengikut fasa yang ditetapkan dalam Pelan Pemulihan Negara (PPN), mengikut Prosedur Operasi Standard (SOP) yang ditetapkan oleh Majlis Keselamatan Negara (MKN). Terima kasih, Tuan Yang di-Pertua.

Tuan Yang di-Pertua: Terima kasih Yang Berhormat Timbalan Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, Rabu, 22 September 2021. Sekian, terima kasih.

[Kamar Khas ditangguhkan pada pukul 2.50 petang]